

SELAMAT BERSARA CIKGU AMIN



Labuan : Seluruh warga SMK Mutiara mengucapkan selamat bersara kepada Cikgu Mohd Aminuddin bin Haji Abdul Malek, yang bersara wajib pada 18 Ogos 2020 yang lalu setelah menyumbang bakti khidmat cemerlang selama lebih 38 tahun dalam arena pendidikan.

Jawatan terakhir yang disandang beliau ialah Pengawai Meja Unit Pembangunan Bakat Murid, Jabatan Pendidikan W.P Labuan yang bertanggungjawab sepenuhnya mengurus Unit Pasukan Badan Beruniform (PBB), Unit Sains, Teknologi, Kejuruteraan dan Matematik (STEM) dan Unit Koakademik Bahasa Inggeris.

Beliau yang lebih mesra dengan panggilan Cikgu Amin terkenal dengan sikap proaktif dalam menjalankan tugas sehingga begitu dikenali di peringkat negeri, kebangsaan dan antarabangsa.

Beliau pernah mendapat pengiktirafan sebagai Tokoh Guru KRS Kebangsaan pada tahun 2013.



Cikgu Amin menyampaikan ucapan ringkas sempena lawatan perpisahan di SMK Mutiara
Selain itu, Cikgu Amin juga pernah diberi kepercayaan memegang jawatan Pengerusi Teknik Dan Pembangunan Sukan Catur Majlis Sukan Sekolah Malaysia selama 15 tahun dari 2004 hingga 2018.

Di peringkat negeri, Cikgu Amin sangat terkenal dengan ketegasan dalam mengurus persatuan-persatuan dan unit beruniform termasuk Kadet Remaja Sekolah (KRS), Kadet Bomba dan Pengakap.

Pasukan STEM negeri juga berjaya muncul naib johan peringkat kebangsaan pada tahun 2019 di bawah kendalian beliau bersama-sama Cikgu Hisyam dan Cikgu Angela Joseph.

Pencapaian tersebut hanyalah sebahagian kecil daripada sumbangan besar beliau dalam bidang pendidikan di wilayah ini.

Malah sumbangan beliau menjangkau tugas hakiki dengan mengambil inisiatif memperkenalkan sistem STAR headcount yang bersifat akademik yang telah memberi manfaat kepada banyak sekolah di dalam dan luar Labuan.

SMK Mutiara berasa sangat berbesar hati menerima kunjungan rasmi terakhir beliau ke sekolah ini pada Selasa lalu. Beliau melapor diri di SMK Mutiara pada tahun 1996 sebagai tempat bertugas pertamanya di Labuan apabila berpindah daripada tanah besar Sabah.

Rombongan beliau ke SMK Mutiara tepat jam 9.00 pagi telah disambut oleh pengetua sekolah bersama 7 orang guru yang pernah berkhidmat bersama-sama beliau di SMK Mutiara yang dahulunya dikenali sebagai SMK Membedai. Mereka termasuk Cikgu Hisyam Abdul Aziz, Cikgu Teo Geok Lin, Cikgu Mary Bong, Cikgu Kim Non Chong Keat dan Cikgu Lee Hoi Tho. Selain itu, Encik Aspan Ngadi yang bertugas sebagai Pembantu Am sekolah turut sempat berkhidmat bersama-sama Cikgu Amin.

Dalam satu majlis ringkas, Cikgu Amin telah menandatangani buku lawatan di ruang legar blok B sekolah sambil disaksikan oleh pegawai-pegawai JPN yang mengiringi beliau yang diketuai oleh Tuan Haji Abdul Rahman Ahmad, Timbalan Pengarah Sektor Pembangunan Murid (SPM).



Ketibaan rombongan Cikgu Amin disambut oleh Pengetua dan guru-guru SMK Mutiara



Cikgu Amin menyampaikan ucapan ringkas sempena lawatan perpisahan di SMK Mutiara
Dalam ucapan ringkasnya, Cikgu Amin mengucapkan terima kasih atas kerjasama yang telah diberikan kepada selama beliau bertugas di Labuan.

“Saya sedia menawarkan bantuan tenaga dan kepakaran jika diperlukan dalam tempoh persaraan saya jika diperlukan oleh pihak sekolah dan jabatan. Sekali bergelar guru, gurulah selamanya” ujar beliau lagi.

Sejurus selepas itu, sesi penyampaian cenderamata kenangan sebagai tanda penghargaan dan terima kasih pihak sekolah terhadap komitmen beliau sepanjang perkhidmatan di SMK Mutiara.

Turut hadir di dalam majlis ringkas tersebut ialah Puan Roslaniah Zainal, Penolong Kanan Pendidikan Khas Intergrasi (PPKI), Encik Fadhil, Kaunselor Negeri dan Encik Hasbollah Amit, KPP Unit Pembangunan Bakat Murid.



Jasamu sentiasa dikenang hingga akhir hayat. Terima Kasih
Cikgu Amin



Cikgu Amin bergambar kenangan bersama Pengetua Encik Nizam.

**P2MP Menjadi Program
Berkesan Ketika Sekolah**

Normal Baharu – Pusat Sumber DSDN SMK Ranche-Ranche



LABUAN- Pusat Sumber 5 bintang W.P Labuan, Pusat Sumber DSDN SMK Ranche-Ranche melaksanakan P2MP (Pencegahan dan Pemulihan Melalui Pendidikan) dengan menerbitkan sebuah rancangan “Selamat Pagi Labuan (SPL) – Jom Kembali Ke Sekolah Norma Baharu” oleh Ranchas’TV. Rancangan SPL yang diterbitkan oleh TV Pusat Sumber Sekolah yang dikenali Ranchas TV pada kali ini memfokuskan kepada pembukaan sekolah pada 24 Jun 2020. Banyak maklumat perkongsian dalam persiapan sekolah normal baharu telah diberikan oleh pentadbir , guru , ibu bapa serta pelajar.



Proses penggambaran program Selamat Pagi Labuan oleh Team Ranchas Production daripada Pusat Sumber DSDN SMK Ranche-Ranche

Untuk julung kalinya Ranchas TV telah melibatkan Jabatan Pendidikan Wilayah Persekutuan Labuan dan 6 buah sekolah termasuklah Kolej Vokasional Sepang, SMK Syed Abu Bakar Baling Kedah, SMK Putrajaya Presint 9 (2), Sekolah Menengah Sains Labuan, SMK Labuan dan guru serta pelajar SMK Ranche-Ranche. Malah, pihak komuniti yang terdiri daripada ibu bapa setempat juga turut terlibat dalam menjayakan rancangan ini. Ranchas' Production ingin melibatkan lebih banyak komuniti dan sekolah luar Labuan untuk meluaskan lagi rancangan SPL ini dan nama SMK Ranche-Ranche itu sendiri.



Pengacara bertugas saudara Aiman Hakim dan Nasrullah

Hanuddin dari Ranchas TV

Selamat Pagi Labuan (SPL) – Jom Kembali Ke Sekolah Normal Baharu yang diacarakan oleh 4 pengacara Ranchas' TV dan Ranchas' FM iaitu Aiman, Balqis, Nasrul dan Raziq yang menyampaikan info pendidikan mengenai Pencegahan dan Pemulihan pandemik Covid-19 dalam situasi Normal Baharu. Seperti biasa, penggambaran ini dilakukan secara atas talian dengan menggunakan skype untuk mencegah penyebaran Covid-19 dan melibatkan guru serta pelajar dari Semenanjung Malaysia.

Selain dari melakukan P2MP, SMK Ranche-Ranche juga bersedia untuk menerima pelajar walaupun perlu memberikan banyak penekanan dari aspek keselamatan pelajar. Jabatan Pendidikan W.P Labuan telah melakukan penilaian terhadap SMK Ranche-Ranche pada 17 Jun yang lalu. Puan Khaziyati Osman, Timbalan Pengarah Sektor Perancangan, Jabatan Pendidikan Wilayah Persekutuan Labuan juga turut sempat meluahkan rasa gembiranya terhadap persediaan SMK Ranche-Ranche melalui Rancangan Selamat Pagi Labuan – Jom Kembali Kesekolah Normal Baharu bersama Warga Pendidik.

“Berdasarkan pemantauan kami di bilik-bilik darjah, bilik khas, kantin dan persekitaran lain, saya mendapati sekolah ini memang cukup bersedia untuk pembukaan semula sekolah pada 24 Jun nanti. Semua garis panduan dan penekanan terhadap keselamatan iaitu penjarakan sosial dan kesihatan memang dilaksanakan”. – katanya dalam rancangan SPL – Warga Pendidik.



Cikgu Nurafidah Mohd Khalid dari Sekolah Menengah Putrajaya Presint 9-2 bersiaran bersama Ranchas TV
Cikgu Yahya

Ahmad Puteh Pengetua SMK Ranche-Ranche berkata, Ranchas' TV merupakan satu-satunya pusat sumber di Labuan yang menjalankan pencegahan dan pemulihan pandemik covid 19 kepada pelajar, guru dan warga setempat melalui medium radio dan televisyen . “ saya sangat berbangga akan usaha ini kerana para pelajar dari generasi muda telah mulai sedar akan tanggungjawab mereka untuk memutuskan rantai covid 19 “ ujarnya.

Manakala Ketua Penolong Pengarah Sektor Sumber Teknologi Pendidikan Jabatan Pendidikan W.P. Labuan, Encik Ag Marten bin Datuk Haji Abdul Rahman memuji akan perancangan Pusat Sumber Sekolah DSDN SMK Ranche- Ranche dengan mewujudkan TV Pusat Sumber. Tambah beliau lagi , pelajar didedahkan dengan kemahiran teknologi maklumat dan komunikasi secara profesional melalui aplikasi teknologi digital semasa yang sangat memberi manfaat kepada para pelajar.

Pusat Sumber Sekolah SMK Ranche-Ranche akan menerbitkan lebih banyak program pencegahan dan pemulihan terutamanya

kepada para pelajar melalui medium radio dan televisyen. Cikgu Sapri bin Idris percaya , komitmen dan kemahiran yang dimiliki oleh team Ranchas Production akan berupaya menerbitkan banyak lagi rancangan yang memberi pendidikan ketika pandemik covid.



Ranchas TV bersiaran secara langsung bersama Puan Khaziyati Osman, Timbalan Pengarah Sektor Perancangan Jabatan Pendidikan WP Labuan. Turut bersiaran Puan Maimoon Haji Matnoh Timbalan Pengarah Sektor Pengurusan Sekolah Jabatan Pendidikan WP Labuan.

Untuk rancangan Selamat Pagi Labuan, Team Ranchas' Production yang terdiri dari Ranchas'TV dan Ranchas'FM melakukan penggambaran selama 2 hari untuk rancangan pada kali ini yang melibatkan ramai warga pendidik, komuniti dan pelajar. Pembantu team produksi juga mematuhi SOP ketika penggambaran berlangsung iaitu penjarakan sosial 1 meter, penggunaan pelitup muka, malah pelajar dari W.P Labuan sendiri melakukan penggambaran hanya secara atas talian. Rancangan SPL ini akan ditayangkan pada penghujung bulan Jun melalui pelantar YouTube Channel Ranchas' Production.

Berita Oleh : SMK Ranche-Ranche

Alumni SK Sungai Bedaun Memimpin Jawatankuasa PIBG Sesi 2020/2022



Labuan – Mesyuarat Agung PIBG Sk. Sungai Bedaun kali ke-31 tahun 2020 telah dirasmikan oleh Puan Maimoon binti Matnoh (Timbalan Pengarah Sektor Pengurusan Sekolah JPWPL).

Turut hadir, Encik Mohamad bin Pindut, (Pegawai Agkat Sekolah), Puan Wiwik Iswandari binti Sudirman (Mantan YDP PIBG SK Sungai Bedaun sesi 2018/2020). Mesyuarat ini telah dihadiri oleh ibu bapa dan penjaga dan juga guru-guru SK Sungai Bedaun, Lebih kurang 200 orang ibu bapa yang hadir dalam mesyuarat PIBG pada kali ini.

Turut hadir, Encik Mohamad bin Pindut, (Pegawai Agkat Sekolah), Puan Wiwik Iswandari binti Sudirman (Mantan YDP PIBG SK Sungai Bedaun sesi 2018/2020). Mesyuarat ini

telah dihadiri oleh ibu bapa dan penjaga dan juga guru-guru SK Sungai Bedaun, Lebih kurang 200 orang ibu bapa yang hadir dalam mesyuarat PIBG pada kali ini.

Puan Maimoon dalam ucapan perasmian beliau berkata, kesepakatan ibu bapa dan guru akan membangunkan murid yang cemerlang dan menjadikan sekolah terbilang, sesuai dengan tagline SK Sungai Bedaun Mekar Terbilang. Beliau juga menyeru ibu bapa untuk sentiasa bersedia membantu pihak sekolah mengikut keupayaan masing-masing.

Puan Dg. Sarifah (Guru Besar SK Sungai Bedaun) mengucapkan setinggi-tinggi penghargaan dan terima kasih kepada barisan AJK PIBG 2018-2020 yang diketuai oleh Puan Wiwik Iswandari Sudirman selaku YDP PIBG telah menunjukkan komitmen yang tinggi terhadap sekolah sepanjang tahun 2018 dan 2019.



Barisan Ahli Jawatankuasa PIBG SK Sungai Bedaun sesi 2020/2022 diketuai oleh Tuan Haji Sahrum bin Samlan (lima dari kiri).

Begitu juga kepada ibu bapa yang sentiasa memberi sokongan kepada pihak sekolah dan berharap agar ibu bapa terus memberi sokongan kepada pihak sekolah dalam setiap aktiviti yang dianjurkan. Katanya lagi, pihak sekolah

sentiasa komited untuk mendidik murid untuk meningkatkan keupayaan mereka dalam setiap bidang samaada akademik, kokurikulum dan sahsiah.

“Kejayaan seseorang murid tidak hanya terletak pada bahu guru semata-mata. Kami sebagai guru hanya memberi ilmu pengetahuan dan murid-murid bersedia menerima apa yang disampaikan. Apa yang diterima oleh murid akan hilang jika tidak diulangkaji dan diasah. Di sini letaknya peranan anda sebagai ibubapa. Tuan tuan dan puan-puan semua perlu bertindak sebagai pendorong., mneggalakkan anak-anak belajar, mengulangkaji pelajaran atau menyiapkan kerja rumah. Jangan kita terlalu ikut kehendak anak-anak terlalu memanjakan mereka kerana sikap sebegini akan merugikan kita sebagai ibubapa pada masa akan datang.” ujarnya



Puan Dg. Sarifah menyampaikan ucapan pada majlis tersebut Pemilihan Jawatankuasa PIBG SK Sungai Bedaun sesi 2020-2022 disandang oleh Tuan Haji Sahrum bin Samlan (YDP PIBG), Puan Sabrinah binti Ishak (NYDP PIBG), Ustazah Norlinda binti Suhut (Setiausaha PIBG), Ustazah Anfal binti Amir (Naib Setiausaha PIBG) , dan Ustazah Yuhana binti Yunus (Bendahari PIBG). Di samping itu 10 orang

AJK dari kalangan guru dan ibu bapa turut dipilih untuk melengkapkan organisasi PIBG SK Sungai Bedaun.

YDP PIBG SK Sungai Bedaun merupakan Alumni SK Sungai Bedaun, beliau juga merupakan guru Bahasa Arab di SK Sungai Bedaun sebelum bertugas di Jabatan Pendidikan WP Labuan sebagai Penolong Pengarah Unit Adab dan Nilai, Sektor Pendidikan Islam.

Diharap barisan Jawatankuasa PIBG SK Sungai Bedaun akan terus komited bekerjasama dengan pihak sekolah untuk melahirkan pemimpin masa depan yang seimbang dari segi Jasmani, Emosi, Rohani dan Intelekt.

Berita Oleh : SK Sungai Bedaun



Puan Dg. Sarifah menyampaikan cenderahati kepada Pn. Maimoon sambil diperhatikan oleh Penolong penolong kanan, barisan ajk pibg 2018-2020 dan pegawai angkat En. Mohamad



Dari kiri : Encik Mohamad bin Pindut (Pegawai Angkat SK Sungai Bedaun), Puan DG. Sarifah binti A.Mahmod (Guru Besar SK Sungai Bedaun), Puan Maimon binti Matnoh (Timbalan Pengarah Sektor Pengurusan Sekolah, JPWPL), Puan Noraliza binti Allbi (Penolong Kanan pentadbiran SK Sungai Bedaun).

**Lawatan SK Rosok Kota Belud
Ke Sungai Bedaun :
Perkongsian Amalan Terbaik
dan Pengurusan PIBK**



Labuan, 2 Mac 2020 – Sekolah Kebangsaan (SK) Sungai Bedaun menerima kunjungan muhibbah guru-guru dan Ahli Jawatankuasa PIBG SK Rosok, Kota Belud Sabah pada 29 Februari lalu.

Rombongan ini diiringi oleh Puan Rina @ Farrina binti Dakim (Penolong Pengarah, Sektor Pengurusan Sekolah Unit Sekolah Khas, JPWP Labuan).

Turut hadir YDP PIBG SK Sungai Bedaun, Tuan Haji Sahrum bin Samlan bersama Ahli Jawatankuasa PIBG SK Sungai Bedaun sesi 2020/2022. Rombongan SK Rosok, Kota Belud telah diketuai oleh Guru Besar, En. Abd. Aziz Zaman berserta ahli rombongan seramai 22 orang terdiri dari Guru-guru dan AJK PIBG SK Rosok turut rombongan tersebut En Sigam Anggor YDP PIBG Sk Rosok.

Guru Besar SK Sungai Bedaun (SKSB) Puan Dg Sarifah binti A Mahmud, berkata fokus lawatan penanda arasan ini ialah Pengurusan PIBK dan perkongsian amalan terbaik dalam pelaksanaan program TS 25, SKSB merupakan sekolah TS 25 bagi kohort 2. Amalan terbaik yang dikongsikan berkenaan Projek menaik taraf Musalla Al-Kauthar.



PERSEFAHAMAN: Puan Dg. Sarifah telah menandatangani memorandum Persefahaman Kolaboratif Startegik Pengurusan PIBK bersama en. Abd Aziz zaman , Guru Besar SK. Rosok sambil disaksikan Puan Rina Farrina (berdiri, dua dari kanan), Ustaz Sahrum bin Samlan (YDP PIBG) EN. Sigam Anggor (YDP PIBG SK Rosok) serta Penolong-Penolong Kanan SKSB dan SK Rosok, Kota Belud, Sabah.

YDP PIBG telah membuat perkongsian tentang program-program yang melibatkan PIBK sepanjang tahun 2018 dan 2019, sehingga melayakkan SKSB menerima penarafan 5 bintang bagi PIBK peringkat kebangsaan.

Penolong Kanan Pentadbiran, Puan Noraliza binti Allbi pula berkongsi tentang projek menaik taraf Musalla Al-Kauthar sehingga dipilih untuk mewakili WP Labuan ke Pertandingan Anugerah Surau Imarah Sekolah-Skeolah (ASISS) peringkat kebangsaan pada tahun 2019.

Rombongan

melihat persembahan kulintangan dari murid-murid SKSB dan dibawa melawat ke kelas-kelas prasekolah SKSB, Galeri Permata SKSB, Taman Herba SKSB, Sudut STEM, Taman Botani Al-Kauthar, dan Musalla Al-Kauthar.

Majlis

menandatangani memorandum Persefahaman Kolaboratif Startegik di antara kedua-dua SKSB dan SK Rosok turut diadakan di akhir sesi lawatan.

Dalam ucapan balas, En. Abd Aziz mewakili ahli rombongan mengucapkan tahniah dan terimakasih kepada pihak sekolah atas perkongsian amalan terbaik dan kejayaan-kejayaan yang telah dicapai, segala perkongsian ini wajar dicontohi terutama sekali dalam penglibatan ibubapa untuk memacu kecemerlangan sekolah.

Semoga dengan adanya jalinan ini kedua-dua pihak akan saling berkongsi ilmu dan bertukar pandangan ke arah pemantapan Pengurusan PIBK di tempat masing-masing.

Berita Oleh : SK Sungai Bedaun



KENANGAN: Puan Dg. Sarifah (duduk, tengah), Puan Rina Farrina (duduk, dua dari kanan) bersama En. Abdul Aziz Guru Besar SK Rosok, Kota Belud (duduk , tiga dari kiri) , En. Sigam Anggor YDP PIBG ,Sk Rosok (duduk dua dari kiri) Us sahrum Samlan YDP Pibg sk. Sungai Bedaun(duduk kiri



TERUJA; Ahli rombongan teruja melihat keadaan persekitaran sekolah yang menghijau ditumbuhi oleh tanaman pelbagai jenis sayur-sayuran di sekitar Taman Botani Al-Kauthar

Kursus Tarbiyah Kepimpinan Pemimpin Kecil SK Lubok Temiang

Labuan, 27 feb 2020 – Seramai 140 orang murid yang terdiri daripada pengawas sekolah, pengawas pusat sumber sekolah, pengawas bestari dan pembimbing rakan sebaya Sekolah Kebangsaan Lubok Temiang telah mengikuti Kursus Tarbiyah Kepimpinan Pemimpin Kecil 2020. Kursus yang dilaksanakan sehari di Pusat Kokurikulum Negeri WP Labuan antara lain bertujuan melatih dan membimbing bakal

pemimpin masa depan ini berkaitan kemahiran komunikasi berkesan terutama ketika mereka menjalankan tanggungjawab sebagai seorang pemimpin yang berkeperibadian luhur.

Selain itu, kursus ini juga memberi penekanan terhadap kepentingan membentuk dan mengamalkan sifat terpuji yang boleh dijadikan contoh kepada murid yang lain. Menurut Haji Adam bin Abdul Rahim, guru besar Sekolah Kebangsaan Lubok Temiang mengharapkan agar kursus seumpama ini dijadikan sebagai program tahunan demi memastikan momentum gaya kepimpinan dalam kalangan pemimpin kecil ini tidak kendur dalam usaha melaksanakan hala tuju sekolah demi melahirkan generasi bertrampilan. Dalam kursus ini, peserta telah menjalani pelbagai aktiviti yang mencabar keupayaan fizikal dan mental seperti latihan dalam kumpulan, merentas halangan dan permainan dinamik.



Di samping itu, Puan Maizura Musliman, kaunselor dari SMK Labuan turut dijemput menyampaikan ceramah Tips Menjadi Pemimpin Terbaik. Sijil watakah pelantikan kepada semua pengawas turut disampaikan oleh Haji Adam di akhir program kelolaan unit disiplin dan unit bimbingan dan kaunseling ini. Kursus kali pertama ini juga telah

mendapat khidmat kerjasama dari jurulatih Pusat Kokurikulum, Jabatan Pendidikan WP Labuan.



Pelancaran Ziarah Cakna & Program Penyayang dan Program Jom Cuci Tangan

Labuan, 24 Feb – Sekolah Kluster Kecemerlangan (SKK) SK Racha-Racha telah mengadakan pelancaran ziarah cakna & program penyayang dan program cuci tangan sempena perhimpunan mingguan sekolah.

Pelancaran program ini di bawah unit bimbingan dan kaunseling iaitu guru bimbingan & kaunseling, Cik Faizurah binti Karim Turut hadir penolong kanan pentadbiran Pn Midah binti Yusop, penolong kanan HEM Encik Shawal bin Abd Rahman dan penolong kanan ko-kurikulum Encik Zulkipli bin Pabin dan Encik Rodhy Edward Anak Edward Jalin, penolong kanan KPKP. Majlis turut dihadiri Yang Dipertua (YDP) Persatuan Ibu Bapa dan Guru (PIBG), Dr Mohammad Hamim bin Mohamad Hanifah.

Majlis dimulakan dengan bacaan doa oleh Ustaz Zulkornain bin Ahmad dan seterusnya ucapan aluan Guru Besar, Puan Norinnie binti Kassim. Beliau berkata pelaksanaan program ziarah cakna melalui program ini, guru dan ibu bapa dapat berkongsi perkembangan menyeluruh berkaitan murid bersama-sama ibu bapa, memahami latar belakang keluarga murid dan dapat berkongsi pandangan bagi memastikan kemenjadian murid.

Majlis diteruskan dengan ucapan perasmian oleh Dr Mohammad Hamim, seterusnya melancarkan program tersebut.

Beliau berharap agar program ini memberi impak positif kepada murid-murid dan turut mengingatkan mereka agar sentiasa menjaga kebersihan diri dan persekitaran untuk mengelakkan penularan Covid-19 dan gejala-gejala lain.



Norinnie (empat kiri) dan Hamim (tengah) bergambar kenangan bersama barisan pentadbir dan ahli Kelab Doktor Muda.

Seterusnya Kelab Doktor Muda di bawah bimbingan penyelarass, Puan Setia Pautas telah membuat demonstrasi "7 langkah cuci tangan" dan cara memakai topeng muka dengan betul. Majlis diakhiri dengan sesi fotografi beramai-ramai.



Ahli Kelab Doktor Muda menjalankan demonstrasi “7 langkah cuci tangan”



Barisan murid yang bersemangat semasa pelancaran program.

Amirul Hishamuddin dari SKK SK St Anne Ungguli Kejohanan Golf MSSWPL bawah 12 Tahun



Labuan – Adik Amirul Hishamudin bin Roslan dari SKK SK StAnne telah muncul johan bagi lelaki bawah 12 tahun dengan jumlah mata 103 di Kejohan Golf Peringkat Majlis Sukan Sekolah Wilayah Persekutuan Labuan (MSSWPL) 2020.

Kejohanan tersebut telah berlangsung di Labuan Golf Club Labuan pada 19 Februari lalu dan dirasmikan oleh Pengarah Pendidikan Wilayah Persekutuan Labuan Encik Raisin Saidin.

Guru Besar dan seluruh warga SKK SK St Anne berasa gembira dan bangga dengan pencapaian adik Amirul Hishamudin. Syabas dan tahniah diucapkan.

Berita Oleh : SKK SK St Anne

“SEDERAP MELANGKAH”



Labuan, 16 Februari– Program Motivasi Kecemerlangan UPSR 2020 yang bertemakan “Sederap Melangkah” berbaki hanya 7 bulan sahaja lagi sebelum menduduki UPSR sebenar. Pelbagai usaha dilakukan untuk membantu para calon UPSR 2020 menghadapi situasi peperiksaan. Perasmian program disempurnakan oleh Guru Besar SK Pekan Satu Puan Anita Shyamini A/P S. Azman dan diisi dengan ceramah motivasi yang bertajuk “Ibu Bapa Terbaik, Anak Hebat” yang disampaikan oleh Pengurus Buddies Training And Consultant Cik Emy binti Othman.

Turut hadir ialah Penolong Pengarah Unit Sekolah Rendah

JPWPL merangkap pengawai Angkat
SKPS Haji Yunus bin Haji Yussof, Penolong Pengarah Unit
Pendidikan Swasta Sektor
Pengurusan Sekolah JPWPL, merangkap NYDP PIBG SKPS Puan
Zaliha binti Mohd Salleh,
PK Pentadbiran SKPS Encik Airol Azmi bin Abd Gani, PK HEM
SKPS Puan Normah
Binti Rahimi, PK Kokurikulum
SKPS Encik Esmi bin Amat, PK PPKI SKPS Encik Mohd Faisal
bin Haji Moin, dua
orang anggota tertinggi PIBG, 30 orang guru, 134 orang
murid dan 120 orang ibu
bapa.

Objektif utama program ini ialah bertujuan meningkatkan keyakinan murid-murid dalam menghadapi situasi pembelajaran khususnya UPSR yang bakal diduduki oleh murid-murid tahun 6. Selain itu, program ini salah satu usaha guru-guru tahun 6 bagi menerapkan nilai-nilai murni dalam membina pembelajaran yang berkualiti.



Peserta motivasi tekun mendengar ceramah motivasi yang disampaikan oleh penceramah.

Dalam ucapan, Puan Anita Shyamini mengucapkan jutaan terima kasih kepada para jemputan terutama ibubapa penjaga murid dan semua yang terlibat dalam Program Motivasi Kecemerlangan UPSR 2020. Bagi pengetahuan semua, keputusan UPSR pada tahun 2019 meningkat berbanding UPSR tahun 2018 dan ianya menjadi pemangkin semangat kepada guru-guru untuk berusaha memperbanyakkan lagi program sebegini bagi mempersiapkan diri murid-murid tahun 6 menghadapi UPSR lebih awal.

“Saya juga berharap agar semua ibu bapa khususnya ibu bapa tahun 6 memberi kerjasama yang jitu kepada guru-guru SKPS bagi melaksanakan pelbagai program untuk murid-murid tahun 6 ini kerana tanpa komitmen semua pihak maka objektif sesuatu program tidak akan tercapai” tambah beliau lagi.

Motivasi yang bertajuk “Ibu Bapa Terbaik, Anak Hebat”, Cik Emy menekankan tentang kesedaran kepada ibu bapa akan kepentingan kerjasama 3 hala iaitu guru, ibu bapa dan murid. Kegigihan serta kesungguhan ahli jawatankuasa melaksanakan program ini memperlihatkan usaha guru-guru mempersiapkan minda dan fizikal para calon sebagai pahlawan yang berentap dalam peperiksaan UPSR sebenar yang bakal menjelang. “Ibubapa hendaklah sentiasa memastikan anak-anak menghormati guru-guru khususnya, agar ilmu yang diperolehi akan diberkati dan dengan keredhaan seorang guru menjadi

tunggak utama

murid-murid mencapai kejayaan kelak” tambah beliau lagi.

Secara konklusinya, penyelaras program iaitu Puan Norsharina binti Nordin menyatakan dengan adanya program seumpama ini akan menjadi pemangkin serta wadah kejayaan murid-murid SKPS malah sebagai tunggak kecemerlangan prestasi akademik SKPS. “Pencapaian terbaik murid dalam akademik merupakan cerminan kepada kecemerlangan guru yang hebat dalam mengadaptasikan segala ilmu pengetahuan sekaligus memperlihatkan komitmen yang tinggi dalam kalangan guru-guru Tahun 6 SKPS terhadap kepentingan calon-calon UPSR SKPS mencapai kegemilangan di dalam bidang akademik” tambah beliau lagi.



Ibu bapa yang hadir memeriahkan program Motivasi Kecemerlangan UPSR 2020.

Empat Guru PPKI SMK Mutiara Berpindah Tempat Bertugas



Labuan, 14 Feb – Suasana sedih menyelubungi majlis perpisahan empat guru Program Pendidikan Khas dan Inklusif (PPKI) SMK Mutiara hari ini. Mereka terlibat dalam proses penempatan semula (redeployment) oleh Jabatan Pendidikan Wilayah Persekutuan Labuan dan akan memulakan tugas di sekolah baharu bermula 17 Februari ini.

Guru-guru yang terlibat ialah Puan Maslika Binti Ramli@Yusoff , Cik Lee Vi Ly dan Puan Helmi Binti Yusup. Mereka ditempatkan semula (redeployment) ke PPKI SMK Lajau mulai Isnin ini. Manakala seorang lagi iaitu Cikgu Masitoh binti Hassan di tempat semula di PPKI SK Pekan Satu.

Majlis yang diadakan di ruang rehat Bangunan PPKI dimulakan dengan bacaan tahlil dan doa selamat bagi memohon keberkatan kepada Cikgu Siti Nora binti Abdul Razak, salah seorang guru PPKI yang akan menunaikan ibadat umrah pada Hujung bulan ini.

Seterusnya majlis turut memberi kesempatan kepada keempat-empat guru berkenaan berucap buat kali terakhir di hadapan kira-kira 50 murid PPKI sekolah ini.



Dalam kesedihan mereka meluahkan rasa gembira dan selesa sepanjang bertugas di sekolah ini dan memohon maaf seandainya ada perlakuan daripada mereka membuat guru, PPM dan murid-murid berkecil hati. Guru-guru ini juga menyampaikan kata-kata semangat kepada murid agar terus memajukan diri masing-masing. Suasana bertukar menjadi sedih apabila sebahagian murid PPKI tidak dapat mengawal

emosi dan mula menangis menahan kesedihan masing-masing.

Kebanyakan daripada mereka telah bersama-sama mengharungi kehidupan di PPKI SMK Mutiara selama hampir 5 tahun. Keadaan murid-murid PPKI yang memerlukan perhatian, bimbingan dan komitmen daripada guru-guru menyebabkan hubungan antara mereka sangat rapat dari hari ke hari. Tidak hairanlah majlis perpisahan ini terkesan di hati mereka.

Puan Maslika binti Yusuf ketika menyampaikan ucapan perpisahan turut mengalirkan air mata menahan rasa sebak. Beliau yang mula berkhidmat di sekolah ini sejak 8 tahun yang lalu berasa sangat sedih kerana terpaksa berpisah dengan anak-anak kelainan upaya ini. Baginya anak-anak ini sangat istimewa dan begitu rapat di hatinya. SMK Mutiara juga sangat dekat di hatinya kerana di sini beliau telah bertemu jodoh dengan Cikgu Mohd. Khairul Ikhsan Bin Mohd. Abd. Razak, juga seorang guru PPKI di sekolah ini.





Penolong Kanan PPKI, Puan Roslaniah Binti Zainal ketika menyampaikan ucapan merakamkan ucapan terima kasih atas pengorbanan, kesabaran dan komitmen guru-guru dalam melaksanakan tugas dan tanggungjawab mereka sebagai guru. "Penempatan semula ini dibuat atas kepentingan perkhidmatan dan bukannya atas sebab-sebab lain" ujarnya lagi.

Majlis telah diakhiri dengan jamuan makan pagi untuk semua murid dan Guru PPKI yang disumbangkan oleh warga PPKI SMK Mutiara. Turut hadir di dalam majlis ini ialah Naib Yang Dipertua PIBG, Puan Zuraidah binti Ahmad.

Berita Oleh : SMK Mutiara



Kesedihan jelas terpancar di wajah murid-murid PPKI SMK Mutiara

**Tarian Singa Pupuk
Perpaduan Warga SK Pantai**



LABUAN, 4 FEBRUARI –
Tarian Singa yang sinonim dengan sambutan Tahun Baharu Cina telah diadakan dengan meriah di Dataran Datuk Mary Yap, SK Pantai. Aktiviti yang dijadikan sebagai acara tahunan bermula dari tahun lepas itu berperanan sebagai salah satu usaha pihak sekolah dalam memupuk semangat perpaduan dalam kalangan warga SK Pantai.

Majlis pelancarannya telah disempurnakan oleh Puan Mahani Bt Hussin, Guru Besar SK Pantai. Dalam ucapannya, selaras dengan tema nilai murni bulan Februari, amalan hormat menghormati haruslah disemai dalam jiwa seluruh warga SKP dalam meraikan perbezaan antara kaum-kaum di Malaysia. Beliau turut menggesa agar warga SKP menjadi warga yang harmoni dan saling sayang menyayangi antara satu sama lain tanpa mengira agama atau kaum.

Majlis tersebut turut dihadiri oleh barisan pentadbir yang terdiri daripada En Mohamad Rizdauddin B Abd Wahap, Penolong Kanan Pentadbiran, Puan Azlina Bt Abd Garip, Penolong Kanan HEM, Puan Farina Bt Mustapa, Penolong Kanan Kokurikulum dan Puan Halifah Bt Salim, Penolong Kanan PPKI. Majlis turut dimeriahkan dengan kehadiran semua guru dan staf sokongan SKP. Menariknya, bukan hanya murid-murid yang teruja dengan persembahan tersebut, ia turut menarik perhatian staf kesihatan KKM yang sedang menjalankan pemeriksaan kesihatan di sekolah pada hari tersebut.

Persatuan Goh Lion Dance Association telah dijemput bagi tahun kedua berturut-turut untuk memeriahkan sambutan Tahun Baru Cina dengan mempersembahkan tarian singa. Turut menarik perhatian ialah dinding yang dihiaskan dengan tema Tahun Baru Cina, serta di seluruh kawasan sekolah termasuk pondok Nilam, pondok PPKI dan prasekolah, yang meningkatkan rasa keterujaan dalam kalangan murid-murid dalam menantikan kedatangan tarian singa. Tarian singa tersebut turut disertai oleh murid-murid program pendidikan khas integrasi dengan singa buatan sendiri.



Bertepatan dengan Program Rancangan Integrasi Murid Untuk Perpaduan, majlis seperti ini sangat sesuai diadakan diperingkat sekolah sebagai salah satu aktiviti tahunan untuk menerapkan perpaduan dan meningkatkan rasa hormat menghormati di kalangan murid-murid SK Pantai. Dengan acara sebegini telah memberikan platform kepada murid pelbagai kaum berinteraksi supaya menjadi lebih erat. Program seumpama ini juga sebagai salah satu cara untuk menangani gejala ponteng dengan menarik minat murid bermasalah kehadiran untuk datang ke sekolah.

Penyelaras program, Pn Natasha turut berterima kasih kepada semua warga SKP khususnya barisan pentadbir dan guru-guru atas kerjasama yang mantap dalam memastikan kelangsungan dan kelancaran majlis tersebut.